


Nos cool Chalandamarz a Zuoz

Preparaziuns:

Ils prüms favrer a la bunura bod ho cumanzo la preparaziun dal Chalandamarz 2018 cun trener a schlupper las geischlas. Pü tard düraunt ün marcaldi da favrer vaivans üna tschanteda cun Ludwig per spartir las preparaziuns. Mincha patrun e patruna stuvaiva fer üna u dapü lavuors. Nus stuvaivans ir piglier las s-chellas culs pitschens, ir a piglier ils rolls e las geischlas, las patrunas stuvaivan fer las caramellas... Ed ils scolars haun exercito da schlupper las geischlas scu mez nars. Que d'eira eir üna vouta bel dad avoir la respunsabilitèd sur da tuot quist' üsaunza. Eir d'eira que nouv da vzair, che cha's drouva tuot per ün bun Chalandamarz. Impü stuvaivans imprendir da suter e da chanter. Las lecziuns da chanter vaivans cun nos magister da rumauntsch, Sar Adrian. Adüna pü dastrusch gniva il Chalandamarz. Cuort aunz quista festa essans ieus a manger pizza culs patruns, patrunas e Ludwig. Düraunt cha vains mangio, vains controllo, scha tuots haun fat lur lezcha.

Punct a las 11:00 dals 18 favrer d'eiran tuot ils scolars e participants pronts tal mulin a Zuoz. Tuot ils mats illa blusa blova, chapütscha cotschna, las s-chellas e la fibla da la vart schnestra. Aunch' ün minut fin cha que cumainza. Tuots haun aunch' üna vouta trat il fled e ramasso las forzas. "S-chelleeeeeeeeeer"!! Cun quist pled ho cumanzo nossa prouva da Chalandamarz. Circa ün'ura essans chaminos intuorn tuot ils bügls da Zuoz. Perche cha stuvaivans fer que nu savaivi precis, ma que vains uossa già fat nouv ans ed uschè fains eir hoz. Cur ch' essans turnos sün piazza da scoula, vains miss sü ils pitschens in üna lingia e s-chello. Mincha sort da s-chella pudaiva musser üna vouta sieu tun. Zieva pudaivan ils scolars musser la prüma vouta quaut bain ch'els savaivan schlupper las geischlas. Punct a mezdi pudaivan ils iffaunts ir a chesa a manger. Ma per nus nu d'eira la prouva auncha a fin. Tuot ils patruns sun ieus insembel a manger al restorant Walther üna buna pizza. Zieva quista pizza essans ieus tal vout e vains diesegno ün muoster vi da la paraid. Per fürtüna nu stuvaivan ils mats disegner, perche ch'uschigliö nu guardess que oura uschè bel. In quel temp haun quels, chi nu disegnaivan, treno da schlupper la geischla tal vout, cha nus nun ans blamains tar la not libra. Cur cha vaivans



pittüro a fin giò'l vout, es quista bella prouva da Chalandamarz eir steda a fin per nus patruns e patronas.

Ils prossems desch dis stuvaivans auncha preparar la sela pel ballin e guarder cha tuot funcziuna per nos Chalandamarz.

Not libra: yeyyyyyyyy

Las set ans vains nus patruns e patronas inscuntros tal restorant Walther e vains mangio üna pizza e bavieu üna buna biera. Zieva cha tuots vaivan mangio vains cumanzo a fer plans per la not libra. Pü tard aint il fraid essans chaminos vers nos local. Nus patruns e patronas vains festagio nossa not libra aint in nos nouv inscunter da giuvenils. Scu prüm vains discutto insembel cun Freddy Bär las reglas per la not. Lo vains tadlo musica, vains giuvo fussballino e giuvo a billard. Que d'eira cool perche cha nus pudaivans fer ils tamazis e nus ans sentivans libers.

A mezzanot d'eirans sün piazza ed ils patruns haun schluppo la geischla e las patronas haun scrit ils noms i'l vout. Üna mezz'ura pü tard essans darcho turnos aint il inscunter da giuvenils perche cha d'eira ün fraid püerch. Lo vains darcho tadlo musica e discurrieu



tuots insembel per nun indrumanzer. Perche cha'l sön cumanzaiva adüna darcho a gnir.

Alura vains fat duos gruppas per ir a s-cheller our. Üna gruppa d'eira suotvart, suot la Via Maistra. Nus ans stuvaivans trer aint bel chod perche cha cuour paraiva d'esser -50°. Ün fraid chi gniva sü da las chammass e giaiva aint in tuot il corp! Que es la part cha nus patruns ödiains il pü ferm. E que cha'ns ho fat gnir auncha pü nars d'eira, cha stuvaivans chaminer in quel fraid ed ün pêr scolars nu guardaivan niaunch'our da fnestra e nus essans stos lo scu tuots a s-cheller desch minuts.

Pü tard cur cha d'eirans a fin ed essans turnos nu vains pü stüdgio vi dad üngüott'oter scu ans s-chuder perche cha nus tuots tremblavans dal fraid. Alura vains auncha mangio e fat festa perche cha que d'eira nos ultim an. Pü tard lura las 6 a bunura essans ieus tar Marco a manger culazchun.

Il cortegi:

Nus d'eirans staungels scu qualchosa ma stuvaivans uoss'auncha tgnair dür ün inter di. Uschè d'eira la situaziun al prüm di ed ella nu gniva neir na megladra, ma nus stuvaivans der tuot u almain pruver da der tuot. Nus patruns e patrunas stuvains sinceramaing dir, cha nus vaivans craj tuots ün pô temma. Che es scha'l chaunt vo illas chotschas u che es scha giains la fosa via? Nus nu d'eirans dal tuot fit ma nus d'eirans pronts, ils scolars d'eiran in lingia e nus essans partieus. La prüma bunura d'eira finida ter svelt. Scu scolar cun s-chella vaivans l'impreschiun cha que düraiva bger pü lönch.



Tuot es ieu bain ed il manger í'l Lyceum deira eir bun. Il zievamezdi dal prüm di vo adüna lönch perche cha giains scu prüm a Madulain e zieva giains bod in mincha chesa sün Via Maistra. Zieva que giains giò la Resgia e pür lura giains sül Castell. Tal zievamezdi stögli auncha dir cha giains sü Madulain adüna culs chavals e las charrozzas, e que es minch'an ün highlight. Zieva cha'l prüm di es a fin sun tuots staungels scu qualchosa. Üngün nu restaregia lönch sdasdo.

Il seguond di vaivans be auncha da fer la bunura. Düraunt quista bunura fains tuot las chesas importantas, scu per exaimpel la Chesa Planta. Da manger ans ho Berni preparo bunas lianginas e da Klarer ho que do ün dessert cha d'eira eir quist an darcho fenomenel. Zieva cha vains chanto sün piazza da la Scoula primara schluppains auncha la geischla ed alura ans allegrains eir già tuots sül ballin.

Ballin:

Ils 1. marz cuort aunz las 14:00 ans vains nus patrums preparo sün ün lung zievamezdi e sün üna lungia saira. Zieva cha d'eirans tuots trats aint vains aviert la porta e lascho aint ils iffaunts. Il ballin ho cumanzo. Que vaiva già ün pêr genituors a garder tiers, ed ün pêr mammas dals patrums haun vendieu da baiver e da manger. Scu minch'an d'eiran ils duos musicists a fer musica, e nus patrums vains guardo cha'ls pitschens sotan. Que nun ho adüna funcziuno ed ils pitschens currivan in mincha direcziun per na stuvair suter. Il temp es passo fich svelt ed a las 17:00 sun alura ils pitschens ieus a fer üna spassageda intaunt cha

nus patrums vains preparo il paunins ed il da baiver. Zieva vains in gruppas da duos do our que, ils iffaunts vaivan fich granda fam. Zieva cha'ls iffaunts vaivan mangio pudaivans nus patrums fer üna posa. La granda part es aunch'ida ün pô a chesa. Las 20:00 essans alura darcho turnos cun noss vstieus da cuschinunz e vains guardo il



teater da la primara chi d'eira fich lustig. Cur cha'l teater d'eira a fin vains darcho cumanzo a suter. La sela d'eira uossa plaina, a d'eiran lo giuvens e vegls. Zieva'l suter vains auncha chanto nossas chanzuns da Chalandamarz cun tuot la sela. Las 23:00 stuvaivan ils scolars alura ir a chesa, nus patrums essans auncha restos fin mezzanot. A nu d'eira pü lo uschè bgera glied ed il Chalandamarz d'eira già bod darcho a fin. Il di zieva essans nus patrums aunch'ieus a rumir sü la sela, ed uossa d'eira il Chalandamarz eir per nus a fin per l'ultima vouta.